

Saturday, November 22, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

## RELIEF FOR REFUGEES

Australia a Queensland khawpui Brisbane ah pawl hrang pathum, Humanitarian Assistant & Disaster Relief Institute (HADRI), Australian Chin Community Council (ACCC), leh MZP-te'n Mizorama raltlan awm mekte chhawmdawl tura thawhhona tur thuthlung (Agreement) an ziak.

He thawhhona thuthlung siamna inkhawmah hian Rajya Sabha MP Pu K.Vanlalvena chu khuallian ni in Queensland Australia Senator Pu Paul Scarr chu khual zahawm a ni. He thawhhona tur thuthlung hi kum thum chung atan a ni a. HADRI CEO Pu Mitchell King te, HADRI Managing Director leh Australia Chin Community aiawh ni bawk Pu Lawmthanga Brisbane leh MZP General Hqrs General Secretary Pu Lalhmingsanga ten hming an ziah hnan a ni.

Queensland Australia a awm Mizo hnam peng pakhat Matu hnam te'n kar kalta Inrinni a Matu Pawlkut an hmanna-ah Pu K.Vanlalvena hi khuallian niin Australian ram hruaitu pali Pu Cameron Dick Dy Leader of Opposition Labour Party MP te, Logan city Mayor Pu John Raven te, Australian tualchhuak hnam hruaitu Pi Heather Castledine te leh LNP party Senator Pu Paul Scarr te chu khual zahawm an ni bawk. African Australian pawl te, Australia tualchhuak hnam pawl te leh Brisbane Councillor pathum ten he Pawl Kut hi an hman pui bawk a ni.

Australia Matu hnam hruaitu te chuan Matu hnam peng hrang hrang 15 te chu Mizo Tribal list a an tel ve theihna tura hma lak sak turin Pu K. Vanlalvena hnenah hian tawngkam leh zia kin ngenna an lo thlen bawk a ni.

A tuk zarah Australian Chin Community Council kaihhruainain Chin hnam peng hrang hrangte Brisbane khawpui an inkhawmpuih hian Rajya Sabha MP chu khuallian niin MZP General Secretary Tv.Lalhmingsanga chu khual zahawm a ni bawk.

Pu K.Vanlalvena chuan khawvel khawi ramah pawh awm i la khua leh tui tha nih a pawimawh a. Ram hrang hranga cheng Zofate hian inpumkhatna an neih a tul a. Mahni hnam bil chauh dinchhuah tumna hi paih boin hnam pum damkhawchhuahna tur hi lungrual taka zawn tlan a tul a ni a ti. Mahni hnam tawng theuh te humhalh chung siin tawng intawm atan Mizo tawng thiam vek a tul thu a sawi bawk.

Insuihkhawm a tul thu te sawi thin mah ila inpumkhatna a awm loh chuan insuihkhawm hian awmzia a nei lo a ti a. Mahni unau indona hian rah tha a chhuah ngai loh thu a sawi bawk a. Zofate dinchhuahna tur chu Pathian thu awihna-ah chauh hi a nih thu leh ralthuam hian eng hnam bil mah a

dinchhuah tir dawn loh thu te sawiin Pathianin a pek mahni ram tlanbo sana ram changkang zawka pem intih hmuh zel chu tha lo a tih thu a sawi bawk a. Mahni ram chhunga harsatna tawk mek ten pem chhuah san zel an châk lohna turin ram danga awm tawh ten theih tawp chhuaha an tanpui chu an mawhphurhna a nih thu Pu Vanlalvena chuan a sawi bawk.



## DRUG HAUL

Nimin leh nimin piah zan khan Mizoram Police-te'n hmun hnihah ruihhlo cheng vaibelchhe 41 leh nuai 64 chuang hu an man.

IGP Pu H. Ramthlengliana'n a sawi danin nimin khan Saitual district Police te chuan heroin Kg 1 leh gram 12 (Hawng 89) an man a. Manipur atanga Aizawl lam pan, Wagon R car atanga an heroin man hi chang vaibelchhe 2 leh nuai 25 chuang hu a chhut a ni a. He car khalhtu Manipur a cheng Jamminlal Touthang (28) lakah Saitual Police Station-ah Narcotic Drugs & Psychotropic Substances Act, 1985 section 21(c)/25/29 hmanga thubuai ziahluh nghal a ni.

Hei bakah hian Ningani zan dar 10:30 vel khan Mizoram Police hnuai CID (Special Branch) hnathawkte chuan Methamphetamine, Kg 49 leh gram 244 a rit, cheng vaibelchhe 39 leh nuai 39 hu chu lirthei lian 12-wheeler TATA truck atangin, Zemabawk Tawngtai Mual, Berawlui, Aizawl bulah an man. Special Narcotics Police Station-ah Narcotic Drugs & Psychotropic Substances Act, 1985 section 22(c) 25, leh 27 hmangin thubuai ziahluh nghal a ni a. He ruihhlo tawlh chungchanga inhnawih a puh mi pahnih - Atabur Rahman Mazumder (45) leh Abdur Rahman Chowdhury (29), Hailakandi, Assam nia inchhal ve ve man nghal an ni bawk. Ngawrh taka a kaihnhawih awmte chhui zui mek a ni.



## MARKET

Tukin khan Aizawl Hunthar Veng chawhmeh leh thei zawrhna hmun chu Hunthar MUP unit Pu C Dakliana, President MUP Hunthar Unit in a hawng a ni.

Hunthar Veng bazar hi UD&PA Minister Pu K Sapdanga hmalakna-in Horticulture Building-ah siam ani a, he bazar thar ah hian thlai thar leh thei chi hrang hrang bakah chhungkaw mamawh chi hrang hrang zawrh a ni a. Thil zuar 40 awm thei tura ruahhmanna siam a ni. Bazar hmunhma cheithat nan hian MLA Fund Rs nuai 15, sing 8, sang 4 leh 870 sen a ni a, thawmthat ngai leh cheithat ngai lai te khawih chhunzawm zel ala ni bawk.



## LADC POLL

Member 25 awmna Lai Autonomous District Council (LADC) inthlan lo awm tur atan a inbuatsaihna kal zelah vawiin khan Dispatch and Receiving Team-te pualin DRDO Conference Hall-ah Training buatsaih a ni a, District Election Officer ( DEO) Pu Donny Lalruatsanga'n a hmanpui.

Pu Donny Lalruatsanga chuan inthlanna fel fai leh thianghlim nei turin mawhphurhna hrang hrang nei ten theihtawp chhuah a tul hle a ti a. A bik

takin Official-te'n tihsual nei lo tura fimkhur a pawimawh hle a ni, a ti. Dispatch and Receiving Team-te an pawimawhin, mawhphurhna lian tak an nei tiin, tha taka an hna hlen turin a chah a. DEO chuan tihsual awm lo tura tha taka training nei tur a chahin, duhsakna a hlan nghal bawk.

Vawiin training- ah hian Dispatch and Receiving Team-te mawhphurhna hrang hrang, tih tur leh tih loh tur, hriat tur pawimawh leh tul dangte inzirtirna hun hman a ni a. Pu Gilbert Lalhlimpuia, (Master Trainer) leh Pu Collin Hlychho (Election Officer) - te chuan training- hi an pe a ni.

